

25/04/1997

Menyebarkan mesej kesucian agama

SIMPOSIUM Antarabangsa Dunia Islam dan Kerjasama Sejagat: Persiapan Menghadapi Abad ke-21 mulai esok adalah lanjutan daripada ucapan Perdana Menteri Datuk Seri Dr Mahathir Mohamad di Universiti Oxford tahun lalu, yang bertajuk Islam: Agama Yang Disalahfaham. Wartawan Berita Harian, Meor Hisham Zulkifli menyorot pandangan Pengerusi IKIM, Tan Sri Ahmad Sarji Abdul Hamid mengenai seminar itu.

Apa rasional IKIM menganjurkan seminar ini.

Pada April tahun lalu, Dr Mahathir menyampaikan ucapan bertajuk Islam: The Misunderstood Religion di Universiti Oxford. Ucapan itu disebarkan dengan meluas oleh Pusat Kajian Islam Oxford dan Jabatan Kemajuan Islam Malaysia (Jakim) dan diterjemahkan. Daripada reaksi yang saya perolehi, saya dapati ucapan itu menggoncang pemikiran mereka yang hadir dan pembaca. Untuk memperluas dan memperdalamkan isu yang dibangkitkan oleh Perdana Menteri itu, IKIM anjurkan simposium ini bersama Universiti Oxford supaya pemimpin yang berpengaruh dapat menyebarkan mesej itu dengan lebih meluas, tepat dan jitu.